

金陵瑣事卷二

明上元周 暉吉父著

江甯傅春官校刊

二京賦

御史余公光號古峰有二京賦嘉靖十五年已經進呈
聖旨送入史館賞新鈔一千貫大城山樵盛時泰嘗曰
孟堅當卯金末造猶以兩都檀名太冲遭列國鼎分尙
藉三都振響今聖明混一天地再闢列聖相承重光累
洽文物之盛亘古無前奈何使豎儒專美千載也因爲
二京賦期上之惟藏笥中竟歸覆瓿矣又長史黃琮字
元質有金陵賦

佳句

瑣事卷二

一

孫總制炎字伯融遊仙云天與數書皆鳥跡身留一劍
是龍精

周滇字伯甯舟中望九華云巖回氣如熾峰去勢猶引
楊翮字子舉遊廣教寺云雲閒聞梵語烟外聽齋鐘

夏煜字允中康郎山奉旨云絕壁秋聲清漱玉白沙月
色爛堆銀

史京兆謹字公謹七星關云路遠家難問愁多酒易醒
西山精舍云磻戶蜂留蜜松巢鶴墮翎遊清涼寺云古
徑依山轉清猿向晚哀覽秀樓云殘霞擁樹作秋色空
翠襲衣生暮寒送屠先生云南浦斜陽芳草色東風啼
鳥落花天日晷爲張布政賦云靜遞青春回禁柳暗移

白髮上朝簪萬松軒云秋聲出樹曉無迹雲氣入簾風
滿庭遊天界寺云地煖漸生眠鹿草松枯欲折掛猿枝
贈吳羽士云松下翦雲縫鶴氅花閒滴露寫鵝經
馬俊贈王鼎歸田云幽齋藏島嶼深徑入林巒江行云
霜蒲藏水鳥煙樹隱柴荆和杜云翠微深見寺綠野暗
啼鶯山居云溪畔游魚吹柳絮竹邊啼鳥避茶煙
湯參將胤勣字公讓漫興云長身惟食粟老眼漸生花
詠守宮云鴛鴦腸斷魂堪冷蜥蜴形消血未乾秋思云
決明階下好顏色郭索沙邊多路歧

蔣主孝字宗倫長嘯云重陰接海蒸沙雨輕霧連山煮
石雲

瑣事卷二

二

蔣主忠字存恕經龍潭舊居云古鎮東西市長江旦暮
潮過鎡公方丈云寶殿迴臨飛鳥上疏鐘遙隔暮雲深
蔣御史誼字宗誼八歲賦詩云青天閣雨雲歸岫紫氣
乘龍水入江

顧教授言字如綸題畫云沙上閒鷗如有約堤邊幽草
不知名

賀山人確字存誠城南雅集云開簾山納翠掃徑樹留
陰都門送別云花落謾驚春已去愁來恰值酒初醒
史山人忠字廷植偶成云爽氣催詩興涼風散酒時又
云雲山開畫障槐柳映蓬門李祭酒時勉送僧云柳帶
天邊雨松回巖際雲草亭宴集云一徑濃花發滿庭芳

草多送王教授云水滿滄江楊子渡雲連緣樹富春山
倪尚書謙字克讓南郊草堂雲林鳩喚雨山光暝畦稻
舒花水氣香

倪尚書岳字舜咨芳池春水云新漲受風牽翠縠好山
隨月墮青螺登兜率巖云晴色撲簾知日近輕陰過檻
覺雲低和鳴治有懷云幽壑雨晴泉響近隔林風細鳥
飛輕

童尚書軒字士昂九日云黃菊酒香人病後白蘋風冷
雁來初南坡草堂云草堂夜雨生科斗花經春風叫栗
留

李應禎各吳匏庵云春樹暮雲無限思薰爐茗椀有餘

瑣事卷二

三

清

沈僉事鍾字仲律黃縣云秋殘羣木老野迴亂山高題
畫云江山秋色淨風雨暮寒多新嘉驛云風定涼生樹
庭空月近人鉅野云沙草釀寒殘雪在野雲翻影斷鴻
懸青陽驛云寒凝簾底爐烟細塵淨牆陰竹色幽

徐僉憲完字用美送何省叔還京口云霜冷江涵秋雁
影雨晴岸拍晚潮聲湖山樓云窗含山色晴橫黛簾捲
湖光晚映霞

姚太守黼字大用報恩訪僧云松雲晴覆地花雨晝飛
空送人還金臺云舟從江上發人向日邊還淮陰夜泊
云燈影遙臨岸月光低近城旅館歲暮云凍雲低欲墜

遠雁斷還聯送周別駕云將雛檣燕留人語衛足葵花
向日妍鳳臺別墅云花深門徑人稀到簾捲春風燕自
來北山吟云瀑布飛空千尺雨春風吹老一庭花春暮
云紅雨落殘清晝永黃鶯啼盡綠陰稠

羅大理輅字質甫花巖寺云山色遠含千古秀洞門深
向半巖開

王尚書敞字漢英渡大同江云花明春欲暮沙暖水生
煙登浮碧樓云石磴斜通郭煙村半掩扉宿碧蹄館云
樹緣入夏重陰合鳥爲留人著意啼

張學士益字士謙映草簾云捲露來春燕搖風入晚螢
綠筠云潤含春嶂雨陰送午窗涼秋夜云露寒蛩韻切

瑣事卷二

四

雲淡月光微文會圖云簾捲高松蒼雪墮窗開羣岫翠
屏寒

羅太守鳳字子文九華遇雨云凌霄縹緲牽高興入夜
淋漓負夙期

向知州鬢字序伯登下鍾寺云危磴苔封滑虛壇草色
幽中秋泛月云風動魚龍吹沸浪露寒蟾兔泣清秋集
會仙樓云逐江芳草自生態遶陌繁花偏冶顏

朱山人字字子容弘濟寺次韻云望中峰翠雲遮斷座
裏花香風送來

方山人憲號聽泉弘濟寺云雲出曉堂龍去遠雪殘晴
樹鳥啼新重遊弘濟寺云五更江色渾無夜二月梅花

別有春又云數聲啼鳥林中曉萬樹桃花洞裏春
景司業暘字伯時憶蔣水部云雲竹暗還雨風花落更
飛石駙馬山莊云移席憐歌歇貪杯較句遲送唐汝立
云潮聲翻石壁山色入虛樓送沈華父云情深惟縱酒
髮亂似驚秋夜酌對曹十四云風簾分坐月皎皎夜榻
翦燭花紛紛遊永甯寺云竹陰到午風猶冷石磴穿雲
路轉幽

陳指揮鐸字大聲齋居云晚樹低分霽春雲淡隔城夜
往新豐鄉云山月巧窺人影瘦夜涼先向客衣生送毛
都督云刁斗夜嚴山月冷旌旗晴散野雲平

劉尙書麟字元瑞贈吳隱君云七步似曹常醉後五言

瑣事卷二

五

逼杜少愁時和張石川云省已正愁題鳳字忘形翻得
換鵝書

朱山人實字子元弘濟寺次韻云花霧拂簷濃似雨柳
風春浪怒於雷又云雨開素練波光淨雲揚青屏岫色
新

馬郎中璣字公信曉行云馬蹄入樹鳥夢墮月色滿橋
人影來

陳副使欽字諒之送外兄北上云長風萬里興芳草一
春愁

金秀才琮字元玉丹陽道中云朝霞推日出陰壑帶冰
流雨泉煮茗云細浪捲風生蠓眼怒濤翻月起龍腥

伊僉事乘字德載游寺云野鶴盤雲下清風挾水涼落花云銀塘水泛魚吹沫華屋泥香燕補巢

梅明府純字一之舟中卽事云雨深煙寺晚風急海門秋

李副使熙字師文秋興云秋深茅屋鳴寒杵月上山城起暮鴉又云風急暮雲聞斷雁雨晴沙渚泛雙鷗

顧尙書璘字華玉通城山中赴岳陽云石出泉爭響林幽樹漫生小江口云興在煙霏際年銷馬跡中飲柳山上云江橫羣水合野闊萬峰開山中晚興云飲牛臨古澗射雉出平田送人還京云衣隨行處敝劍就醉中看登清涼山云古寺頻來僧盡老重陽欲近蠓爭肥擬宮怨云御前卻輦言無忌眾裏當熊死不辭又云君王自信圖中貌靜女虛迎夢裏車

瑣事卷二

六

顧副使瓌字英玉曉行云鴉翻初日動馬過斷冰妨快雨有述云片雲生晝暝急雨淨高天夜渡黃巖江云水國寒多眠未穩城霞路近夢先通孟有涯載酒息園云驚鴉忽翻庭露下暗螢時度水煙深送羅侍御還南京云心同江月隨君遠家在秦淮得信稀

顧貢士嶼字懋涵白牡丹云玉妃罷醉春無暈素女淩波夜有香天闕山云山深六月藏寒霧地迴諸天散曉鐘

顧秀才應祥字孝符過龍山別業云雲起移山色風鳴

亂鳥音江上曉行云曉行江路月人語夜船燈送朱子
价云人去天涯春草綠望迷江上暮煙平遊栖霞寺云
流泉激石常飛雨靈草經寒不斷香除夕云今宵對雨
娛殘歲明日逢人說去年登樓云宮闕半從雲裏出山
光多自雨餘來

謝山人承舉字子象遊寺云深林下馬蒼苔滑野寺入
門秋爽多又云春雨洗山諸寺近秋花薰夢一樓空病
中答華玉山與詩肩齊聳瘦菊隨病眼對爭開

謝布政少南字應午楊少室自粵入賀云月出煙中樹
星窺水面舟嚴子陵釣臺云故人不預興亡事太史空
勞處士猜十六夜少室右史招宴云尊前寶炬留明月

瑣事卷二

七

簾外金花綴綵雲

龍僉憲霓字致仁姑蘇道中云野鶴巢難定春蠶繭自
忙飲東麓亭云墩傳往昔名空在劍化何年氣尙浮寒
夜飲里中諸公云氣回簷雪融還細雨濕樓煙重不飛
管檢校景字子山遊幕府寺云秋色霜中樹寒聲雨後
潮又云峰斷青蘿合江空白練長秋陰云風隨黃葉亂
雨逐黑雲來

金舉人大車字子有楷上人山亭云敗葉秋皆墮寒煙
晚欲無幽興云放棹晚潮至開門春草生

金秀才大輿字子坤遊城南諸寺云黃葉喧高樹青山
起夕煙固湖城云山城晴自濕水國晚多寒

徐山人霖字子仁泊楊青驛云雲輕難掩月海近易通
潮冬遊虎邱云凍鳥自高樹寒梅或背巖歸舟漫興云
覽鏡愧難留黑髮當杯狂欲醉青山

王參議徽字尙文舟中夜雨聞雁云淒涼應帶雨悲咽
爲兼風題王子成壁云雨過苔侵壁潮來水到門登大
觀臺云秋聲帶葉翻林下暝色隨雲渡水來

王太僕韋字欽佩秋日游城南云寒花散幽馥午樹結
團陰秋居雜興云閒行無剩事孤坐有餘思寄羅敬父
云尊前花氣風生席湖上簫聲月滿船西堂偶興云一
春人醉斜陽裏三月鶯啼細雨中秋日卽事云梧桐月
上風初到蟋蟀聲中雨漸涼

瑣事卷二

王秀才逢元字子新對酒云潦倒不忘桃葉句蕭閒應
戀竹皮冠

張士瀾字心父秋郊云野梅當澗落山鳥隔花鳴

李明府曉字子晦江上望金山云濤聲風外壯雲影日
邊輕滄州道中云斷靄斜陽迷去雁平隄古木集寒鴉
春寒夕景云山腰繞樹嵐初起天末輕陰日欲沈

周尙書金字子庚過楊六郎城云山河未改豪華盡夷
夏平分草樹迷涉忽都河云極浦遙山無去雁古城荒
堞有啼鴉

許山人鏜字彥明秦淮步月云疏鐘城外寺曲檻水邊
樓晚泊毘陵云西風疏雁陣科日變山容

許太常穀字仲貽何元朗移居云買得曲池堪鬪鴨種
成芳樹好藏鶯集沈大理云簷前香篆將花氣院外松
風雜鳥聲

胡副使汝嘉字懋禮過黃華山云林鴉翻暝色巖樹駐
秋雲嘯臺云淡雲千里色落日半巖陰

王太守可大字元簡壽州渡河云沙淨空山雨風香野
岸花

沈御史越字仲甫風雨憶城南杏花云濕雲帶暝酣清
晝芳草含煙靚綠苔冬日諸君集樓上云待臘江梅初
抱萼凌霜籬菊尙留妍

陳太僕沂字魯南遂初齋云苔痕雙屐齒花影半簾鈎
經牛首山寺云鳥聲林葉暗山影石溪寒入西山云山
出曉雲亂鳥鳴春日遲燕集西園云煙橫邨遠近月出
樹扶疏永福寺晚眺云峰巒樹色初晴後樓榭煙光欲

暮時

陳同知時伸字元晉試燈夕得樓字云火樹參差人影
亂香煙繚繞月光浮

陳明府時萬字孟錫元宵大雪云人間矜火樹天上放
冰花登大觀亭云帆開二水天逾闊雲盡三湘鳥共低
張坐營鵬號竹渠登水雲亭云月明江似洗波動石如
浮

張指揮維字管文官舍夜懷云風穿燈影亂寒逼雁聲

高

楊貢士希淳字道南除夕云酒能扶病客春欲傍愁人
秋曉述懷云病常欹枕晝猶夢瘦不禁秋雨更寒潯陽
阻風過海天寺云地鄰彭澤懷陶令山枕匡廬憶遠公
牛首云去日僧非憐我老舊遊人遠得書難

鄭侍御濂字師周送鄉人歸云江空秋雁影砌冷夜蛩
聲疏請歸省云寒雁投陽書未寄秋風報冷客先知
鄭推府河字師程至江上云愁客難爲別閒雲漫不開
又云天地水爲際江山雪滿樓

羅主簿燾字元溥晚過東山寺云聞鐘知寺近逢鹿覺
山深宿高座寺云月來半榻寒松影風送滿山秋葉聲
陳明府芹字子野寄玄超云水邨寒氣早山館月明孤
焦山云煙橫沙市遠船過海門稀遊靈谷寺云重簷捲
霧青欲滴曲水穿雲淨可憐與諸友集姚園云奕散青
林寒日墮歌翻白雪凍雲高

李郎中逢陽字維明關廟云志許乾坤合身先吳魏亡
楊秀才穀字惟五宿大城山莊云隔樹林穿暮披榛徑
轉微又云敗壁青苔應磔雨寒潭碧水似澄霜

黃驗封甲字首卿陳氏園亭云曲徑沿溪入疏峰帶雨
青春日云鳥聲侵夢斷竹色映階虛秋興云山高月出
雁初下水遠天空人自愁天甯寺云短劍孤懸凌夜月
敝裘初紉薄秋風

馬明府應龍字呈道和杜秋興云興發新秋翻宋賦捲
吹蘆葉擬胡笳

張副使鐸字鳴治宛馬云盤旋風欲動拂拭雪仍迷
陳僉事鳳字伯羽寄題石塘云波間先受月池迴不驚
鷗臘日云沙白常含凍雲昏易作陰

高汝州遠字近思泊舟對月云風清沙岸淨月滿浪花
圓弘濟寺云江豚吹浪出還沒野鷺得魚棲復驚

臨淮侯李言恭字惟寅小桃源云山折路疑盡花深鳥
自藏暮投伏城驛云亂水斜穿徑空山曲抱邨送安茂
卿南還云夢回芳草遠人去落花多

朱沅州衣字正伯神策城樓望玄武湖云湖光盪雲日

瑣事卷二

十一

山色印寒流登弘濟江閣云孤帆蕩漾緣何事遠岫依
微莫辨名

景山人霽字光甫山寺避暑云紅塵朝易夕綠蔭夏疑
秋又云篆煙縈佛牖雨氣暗雲峰

吳侍郎自新字伯恒神策城樓望玄武湖云樹色含風
冷溪聲帶雨寒湖陰夜泛云九天忽駕冰輪出萬里遙
瞻玉鏡開

馬山人光靈字一卿漫興云風微魚淺戲泥煖燕先知
又云疏雨長虹斷遙山積翠微

何參議汝健字體乾秋雨晚晴云餘霞明反照疏柳淡
輕煙暮春鴻石園云坐久花香細談深鳥語幽灌園云

天涯飛鳥外人事落花初宿牛首云山色有無朝雨後
江光隱見夕陽時竹素園漫興云花片飛來情自愜松
陰結處坐偏深雪夜次韻云檻外冰花侵履跡庭前竹
翠濕人衣

何御史澶之字仲雅別陳師宗伯云潮痕迎雨急帆影
帶煙過曉川云月瀉空潭水霞餘幾樹楓登繁臺云斜
日窺疏雨歸鴻綴遠天無題云雲連楚岫還輕散潮向
潯陽總未通秋日李王孫園亭云清光曲引秦淮水紫
氣飛來鍾阜峰

顧居士源字清父燕子磯云淺沙披月蚌高浪出風豚
虎洞小庵云石冷燈無焰香消火尙薰山寺晚歸云散

瑣事卷二

十二

策衝寒翠褰裳踏晚晴

金山人鑾字在衡徐太傅園云楊柳晚風靜芙蓉秋水
香悼梁姬云江梅空索笑湘竹自成斑靜海寺云長風
吹老樹斜雨過疏籬次通津驛云風輕雲氣薄月淨水
光寒北河道中云歸鳥亂啼原上樹夕陽多在水邊村
送李谷陽云客中候曉霜如月馬上逢春草似煙夢崔
云竊歸靈藥三山月吹落榆花一笛秋岳少保墓云臨
危叩馬書生口立主班師宰相心憶江南云風簷聽竹
心先碎雨檻移花夢亦香

馬明府汝溪字誠望新秋云明月半窗能自至白雲滿
榻似相留秋日永甯庵社集云山色遙連秦樹碧溪聲

常帶梵鐘幽

姚鴻臚淞字元白聞雁云數聲風處斷孤影月中翻顧
孝符見過云旅懷秋欲盡鄉思客初來贈周文美云燕
市風霜凋客鬢越山兵燹限河梁

姚太學之裔字玄胤喜諸君子入社云寒花照座金爲
蕊明月窺簾玉作鈎冶城餞吳莫魏張四子云黃金舊
鑄雙龍劍白雪新傳四傑才

姚太守汝循字敘卿綺霞閣小集云酒邊過白鳥鏡裏
出青山浪禪房云閒花苔上落疏磬雨中沈送胡懋誠
云離愁隨草長別淚迸鶯啼江南春游云宿雨青郊潤
和風白袷輕題江漱垂綸卷云羊裘雙短鬢蝦菜一扁

瑣事卷二

十三

舟邀笛閣云岸柳秋清夜汀葭月白時和幼安泛秦淮
云潮起輕風生遠浦夜涼明月滿扁舟

宋兵憲存德字惟一叨轉南曹述懷云櫪下驪駒淹歲
月庭前蒼檜飽風霜

焦明府瑞字伯賢謝公墩晚眺云夜雪萬家鴻影度江
聲千里岸痕高後湖云無數鷗鳧天上下幾重樓閣樹
高低

盛貢士時泰字仲交登賓峰樓望雨云一徑穿雲上千
山送雨來天界寺云松聲寒遶塔竹影午過牆三茅峰
云鳥飛青嶂外人語白雲中幽棲寺云鍾阜斷雲連古
戍秣陵黃葉下西風集瞻雲樓云林下捲帷涼欲度花

邊迎扇暑將無試燈夕
讌瞻雲樓云繞樹銀花初試火
隔簾香霧半垂鈎

盛秀才敏耕字伯年山居雜詠云
花發臨危岸鶯啼過
遠林宵征云水暝螢光亂風秋雁語清
又云衙晚催蜂去巢危促燕飛
贈張羽王云潮聲遶屋初消雪
梅蕊知春競放晴遊三台洞云
石扉藤蔓迷樵路流水桃花引
客來送大安和尚歸廬山云
送客溪頭防虎嘯逃禪樹底借枝封

卜長史鏜字子振送人還吳門云
衰柳帶煙迷遠浦片帆隨雁下
長洲遂閒堂云日高臥榻茶煙細
晝靜鈎簾樹色深

瑣事卷二

十四

鄭太守宣化字行義九日燕邸遣懷云
叢菊自開吳地蕊疏碁故擣漢宮聲
送安伯惺之成安云蕭騷鬢爲風
霜短落拓官驚歲月流春寺讌集云
海日倒銜天外影江雲遙落坐中杯

萬明府夢桂字雅徵臘盡客蕪江云
凍雲仍易合殘雪未全消客愁云
情淹黃絹字身敝黑貂裘吳門有感云
天青鴻雁近水長鰕魚肥程孟孺北上云
池上墨花春霧重閣中玄草錦雲長
秋日過懷玉山下云花沿石竇晴偏潤
樹拂涼颺秋正分贈景光父云長林風細
花香暖古寺雲移月上初

周明府元字長卿集宜遠樓云欄干千嶂
暝砧杵萬家

秋過棲霞東之讀書處云六代碑存誰幼婦百年書就
恰名山

余祭酒孟麟字伯祥問胡太史病云閒身稱病易春色
閉門多集邀笛閣云花深雲不去水闊月全低野興云
褰衣經樹溼懸榻待雲還過天界寺讀書處云花垂竹
戶遲歸燕書滿藜牀落蠹魚早春喜晴登鳳凰臺云草
逢霽後留烟細花入春初抱日明送楊道南入楚謁耿
師云風塵傲世遊偏壯貧賤藏名道益尊

焦貢士尊生字茂直寄子餘云病從秋思得嬾任鬢毛
蓬送周安陽云語向韓陵堪片石跡陳漳水尙高臺白
雲洞云千林落日稀人跡一徑疏鐘散鹿羣燕子磯云
微風山郭酒帘動細雨江亭燕子飛泛舟秦淮云疏雨
乍迷桃葉渡冷風時度竹枝歌閑居云抱瓮丈人時共
井賣漿任俠舊爲鄰

謝秀才黃鐘字元聲焦山云沙市月明潮似雪海門風
起浪如雷賀余移居城東云閉關領略溪山好擬易勾
除月露才

徐公子邦甯字仲謐秋日莊居云樹密雲來暝山深雨
過寒日涉園云水翻細浪魚銜藻露滴空階鶴隱松牛
首云寺靜野雲穿石竇洞虛飛雨溼莓苔

張秀才振英潭西樓云松稍白月供長嘯樓角青山伴
苦吟

崔秀才士元字伯仁薄暮寶應湖云水邊綠草依晴鷺
岸上青林叫夕蟬

陳秀才弘世字延之冬日登清涼寺云林枯千嶂削煙
冷半江昏清涼山坐月云孤亭全受月絕巘半沈煙獻
花巖云雲歸一巘白霜過半山紅送王曰常云惜別淹
尊俎含情悵管絃羅惟一移家冶城云委巷樹深疏轍
跡短墻花發燦棋枰

馬氏芷居陳石亭夫人苦雨云楊柳深藏徑梨花靜掩
門

僧來復字見心謝太祖賜食云闕下彩雲移雉尾座中
紅芾動龍光

瑣事卷二

十六

僧溥洽號南州應制題江東橋云浮黿曉渡江流穩役
鵲晴瞻漢影遙

僧宗泐字季潭夢清遠兄云劇知情是妄翻說夢成真
往南陵云人煙千嶂裏客路百花中間行云幽花不礙
路偃木自成橋

天界寺僧果斌同諸官長遊牛首云官閒何待隱僧老
欲忘禪和沃州呂公云鳥棲雲外樹龍護鉢中蓮
天界寺僧圓慧號秀峯夏日卽事云草閣涼生今夜雨
海榴花發去年枝

寬悅號臞鶴普德寺僧雲杜早發從潘景升度歲云谷
口梅花晴帶雪望中煙樹冷孤村春日山中寄景升云

千樹夕陽啼暮鳥一溪殘日掩寒扉
弘恩號雪浪報恩寺僧郭次父舍宅云江山空姓字樓閣但雲煙宿箭闕云半嶺雲生空翠合滿林花散曙煙封小橋望月云一片清光孤玉笛千家烟樹亂疏鐘吳山人擴字子充崔駙馬山池云帝女巧將霞製錦仙人長以鵲爲橋長吟閣述懷云城中藝圃甘遺世屋裏梯雲好看山

字品

杜太常環字叔循宋景濂稱其正書入能品

陳中復工楷書

陳孟顥工楷書

瑣事卷二

十七

朱孔陽洪武中以楷書名榜書更妙

朱銓字士選迺孔陽弟也太宗文皇帝選寫金經入翰林習書

江濬字子澄仁廟潛邸召寫金泥字經最眷注之

顧謙以楷書薦舉官主事

蔣主孝工小楷

翟太常瑛字廷光作字運筆如飛結體流麗可愛

李太僕應禎字貞伯景泰癸酉舉人成化時有旨命寫

佛經上疏言臣聞天下國家有九經未聞佛經近閱楊

君謙外集集中載貞伯全疏

枕肱童士昂楷書遒勁有法

辣齋王尙文小楷工

馬郎中璫字公信法趙孟頫

紫芝黃謙字搗之行草遒勁古雅而榜書更妙

景前溪伯時初工真行後師周伯琦小篆頗得風骨

南原王欽佩真草清雅有法

東橋顧華玉真草皆清徹可愛

劉南坦元瑞法羲獻片紙隻字人得之爲至寶

顧英玉真草皆有晉人風味

徐子仁九歲作大書操筆成體正書出入歐顏大書初

法朱晦翁幾亂其真後喜趙松雪筆力遒勁布構端飭

成一家書至於篆字得法于異客更造闔奧西涯李相

瑣事卷二

十八

國白巖喬太宰時號篆聖見則吐舌下之曰吾輩不及
吾輩不及

周約庵子庚有王右軍風骨

王吉山子新學聖教序最擅書名但恨其過于圓熟耳

山農金元玉初法趙子昂晚年學張伯雨精工可愛落

筆人便持去吳中文徵仲極喜元玉字凡得片紙皆裝

潢成卷題曰積玉

石亭陳魯南法蘇眉山評者謂不減于吳匏庵篆隸亦
佳

玉泉陳伯羽行書筆筆晉人

馬南江呈道嘉靖二年貢士四體俱工極有書學

邢太常一鳳字伯羽嘉靖辛丑進士及第工篆書

顧寶幃清父法孫過庭筆力遒勁古雅

馬鷺汀誠望刻意聖教序幼年者佳

橫厓陳子野法鍾王俊逸可愛

秋字胡懋禮得意之筆酷似枝指生

雲浦盛仲交小楷法倪元鎮行書出入于蘇米兩家古拙中有拔俗之韻隸字更優有玄牘記一冊品題古今名帖

姚秋澗元白行書出入于黃山谷趙松雪兩派而得于趙松雪者爲多

許石城仲貽工行書

瑣事卷二

十九

楊虛游道南真草自成一家

金慕楨名魚乃赤松山農家學筆力稍軟

謝髯九子象出于蘇黃兩家筆力清硬

金蓉峯名元初字玄予行書有法有趣

何太吳仲雅工行書

畫品

靜誠陳先生遇善山水曾寫太祖御容妙絕當時

陳中復靜誠先生弟繪事精雅幼年在靜誠先生側戲弄筆墨靜誠叱曰吾豈他無一長汝迺習其下者乎亦工寫照

史謹太倉人工繪事弱冠從軍滇陽洪武末年有薦其

才授應天府推官未幾左遷湘陰丞遂流寓金陵自號吳門野樵長於寒林雪景自題其畫云雨餘山色翠如苔樹杪寒烟濕未開童子無端掃紅葉隔林知有故人來

張益字士謙號憇庵永樂乙未進士喜寫松竹與同榜夏昞同邸舍昞曰子當以文名世墨竹小技宜讓我矣故憇庵之畫最少有畫法一卷藏于家

沈誠字文實別號味茶居士喜繪事興到落筆自成一
家

金太守潤字伯玉號靜虛工山水神會天出傳世者絕少予曾見其長春龕卷迺公宦遊所見呂洞賓故事

瑣事卷二

二十

殷善字從善花木翎毛自呂廷振林以善兩派中來殊有清致從善之子名偕能專其業

傅禮字公緒與同時鄭春鄭堂皆善禽鳥花木布景染色三人如出一手

馬俊字惟秀號訥軒山水倣唐宋人最古雅獨以鬼神馳名

吳瑄字元玉號石居成化己丑進士官至郎中山水法戴文進

李葵字誠伯見人繪畫輒能模倣雖百物像貌無不曲盡

蔣子誠幼工山水中年悔其習遂畫佛像觀音大士爲

國朝第一手

許昂字世顥梅花清楚不俗

胡隆字必興蔣子誠門人工於神鬼陳魯南贈之詩云
生此南都往北都十年踪跡遍江湖歸來爲憶當時事
醉裏淋漓入畫圖

史大方工山水謝子象題其畫云朱檣畫舸繫神都翠
篠黃茅覆酒壚好似石頭城外景隔溪歌舞莫愁湖
史癡山水人物自寫胸中逸氣不可以畫之常格求之
汪質字孟文浙人流寓南京山水專師戴靜庵但用墨
太濃耳

吳偉字魯夫一字次翁號小仙江夏人童年流寓金陵

瑣事卷二

二十一

工山水人物薦入仁智殿供奉有畫狀元之稱臨繪用
墨如潑雲旁觀者甚駭少頃揮灑巨細曲折各有條理
若宿構然

山農金元玉畫梅花有逃禪老人筆意自題絕句云一
別西湖未得歸孤山風月近何如春來賸有看花興又
向君家寫折枝

金璿字元善號松居精於醫旁及繪事曾寫袁安臥雪
圖兄元玉題云一片堅貞天地知甘貧豈但雪中饑生
平恥作千人態縱使天晴也不宜

嚴賓字子寅號鶴邱精於賞鑒與文翰林徵仲交好最
厚得徵仲畫百餘幅畫小景酷似徵仲

蔣嵩號三松善山水人物多以焦墨爲之最入時人之眼

九峰徐子仁雖不以丹青馳譽所畫松竹花草蕉石皆精雅可愛

許縉字尙文工山水

馬稷字舜舉號醉狂善山水人物花木竹石

薛仁字子良號半仙山水人物花草專學吳小仙之筆半仙之號謙詞半於吳小仙云耳

李著字潛夫號墨湖童年學畫於沈啟南之門學成歸家只做吳次翁之筆以售緣當時陪京重次翁之畫故耳謝子象題其畫云銀河無路泛仙槎一舸空江此是

瑣事卷二

二十二

家殘月照人秋睡穩不知清夢在蘆花

秋碧陳大聲山水倣沈啟南余藏送史廷臣一小幀自題絕句云情深此日難爲別相送元方又季方萬里楚江孤棹迴穩吟秋色到維揚

景卿字夢弼善小景花草常寫杏花自題絕句云晴團紅粉護春煙彷彿江村二月天記得踏青回首處一枝斜拂酒樓前

王子新畫法趙松雪得其神俊

黃珍字懷季花草有黃荃筆意

許通善畫牛可亂戴松之筆晚年自悔用心之悞恐墮畜生道中迺專工佛像

林旭字景初少聰敏善畫山水品格甚高尤精於傳真
年未三十而卒

陳子野墨竹花草絕無一點俗氣文徵仲稱其竹枝清
氣遍人且戒門下士到南京不可畫竹彼處有人蓋指
子野

陳石亭六七歲便搦筆模倣古人之畫後入翰林與文
徵仲講論其畫更進凡宦游所歷覽之名山大川皆圖
成卷軸最得馬河中夏禹王之妙

鄒鵬字遠之號筠居工山水

盛安字行之號雪蓬居聚寶門外五聖巷爲人梗介清
約以梅花馳名詹景鳳云盛行之畫梅豪縱而爽趣勝

瑣事卷二

二十三

陳憲章王謙皆不及

王孟仁字元甫山水清潤有法文徵仲極喜之謝應午
題其畫云吾愛王摩詰從來老畫師鉛華渾欲洗墨韻
自生姿疏樹秋雲合孤舟晚鏡移煙江曾獨泛相對正
堪疑

胡懋禮山水脫去塵俗但所畫者不多耳

謝賓舉字子隱山水人物步驟于戴靜庵可謂具體而
微畫畢其兄子象卽題詩於上子象贈子隱詩其略云
圖成便索老醜作每幅空處題一篇我詩借君畫增價
君畫資我詩并傳弟兄依附有如此人誇玉樹芝蘭全
顧清甫究心禪理與高僧結西方社別號寶幢居士家

藏宋元名筆甚夥善雲山斟酌米元章高彥敬而自成一家不受人潤筆多畫與騷人衲子有百年智巧消磨盡慚愧人傳粉墨痕之句余藏一軸清父題五言絕句云策杖青林晚山寒雨溼衣野雲仍有意相伴宿柴扉詩與字俱妙絕

雲浦盛仲交有逸才有妙賞博學多聞落筆成詩文不煩點定家有小軒文徵仲題曰蒼潤以仲交愛臨摹倪元鎮竹石取沈啟南詩筆蹤要是存蒼潤墨法應須入有無之句楊用修先生與之作記枯木竹石可亂元鎮真跡

秋澗姚元白晚年工畫梅枝

瑣事卷二

二十四

楊秀才一洲字伯海山水小幅可觀好游名山足跡幾遍五嶽人譏之云伯海手不如脚曾寄謝茂秦山水圖茂秦答之以詩云畫逼輞川工王維信可同雲微天若遠石斷水如空裂素寫能盡披圖意不窮相知萬里合相望一書通神會江天月名傳海嶽風君才變化裏吾道寂寥中猿鶴交年久漁樵化歲豐懶時猶蔣詡聖代豈楊雄地勝閒多賦山靈暗有功寒暄依古柏霜露感秋蟲養拙聊幽事探奇奈老翁丹青長在壁逸興滿蒿蓬

王秀才建極字用五工山水

何侍御仲雅工山水戲寫蘭竹最有清趣

胡宗信字可復山水最秀潤惜壽不永耳

史元昭工山水謝子象題其雲山圖云玉芝堂前兩日
雨問病無人不開戶東牆臥對溪山圖雨滄雲蒸互吞
吐畫師云是史元昭心法妙傳公系祖高峰一二或可
見老樹千枝不能數微茫遠水通桃源削拔橫空類天
姥林閒一亭蒼翠深溪叟山翁作亭主山中雨多溪漲
添已隔漁郎在汀浦洞口雲昏晝欲迷似阻樵人出幽
塢巖崖豹棲知變文雨晴出山西日曛

沈碩字宜謙號龍江長洲人流寓南京曾學畫三年不
下樓工于臨摹

姚太學衍舜字光虞工寫松枝

瑣事卷二

二十五

杜大成工草蟲

齊庶人朱慶聚字仲賢號似碧山水與枯木竹石清雅
可觀

盧氏名允貞字德恒號恆齋倪文毅公夫人白描精妙
有九歌圖璇璣圖二卷藏於家文毅公曾孫蘄水令名
民悅者曾出以示客予得以觀之

馬氏名閑卿號芷居陳魯南夫人善山水白描畫畢多
手裂之不以示人曰此豈婦人女子事乎

沈氏沈宜謙女楊伯海妻工折枝花吳中黃姬水題其
杏花云燕飛修閣簾櫳靜紈扇新題春思長妙繪一經
仙媛手海棠生豔復生香

僧可浩號月泉靈谷寺住持畫蒲桃有生意不減溫日
觀之筆豐坊南隅題其蒲桃云龍宮瀕洞不可測下有
七寶光琉璃老師手掣千尺幹粒粒總是眞摩尼掌取
摩尼和殼吸八部呼驚龍女泣醍醐入口冷煖知醉臥
青林滿身溼昔有大師名日觀解圖蒲桃至今傳我師
天機通道妙絕精何代其無賢出定堂前如一戲四壁
蕭蕭風雨至從今福慧并圓明三界虛空青擊碎南宮
仙人初下馬欣然長歌爲師寫請師持此詣靈山應道
無非妄語者

廣禮號大鏡報恩寺僧陳子野授以畫竹之法

曲品

瑣事卷二

二十六

馬俊小令不減元人

史癡工小令

陳全秀才有樂府一卷行于世無詞家大學問但工于
嘲罵而已

陳鐸有秋碧樂府梨雲寄傲公餘漫興行于世詠閨情
三弄梅花一闋頗稱作家所爲散套穩協流麗被之絲
竹審宮節羽不差毫末

徐霖少年數遊狹斜所填南北詞大有才情語語入律
媚家皆崇奉之吳中文徵仲題畫寄徐有句云樂府新
傳桃葉渡彩毫遍寫薛濤牋迺實錄也武宗南狩時伶
人臧賢薦之于上令填新曲武宗極喜之余所見戲文

繡繻三元梅花留鞋枕中種瓜兩團圓數種行于世
陳魯南有善知識苦海回頭記行于世人最膾炙者梅
花序

羅子修雪詞絕妙

盛鸞有貽拙堂樂府二卷

邢太常一鳳字伯羽所填南北詞最新妥入絃索

鄭仕字子學工小令

胡懋禮有紅線雜劇最妙同時吳中梁辰魚亦有紅線
雜劇膾炙人口較之于懋禮者當退三舍

杜大成工小令有詞評一卷名納涼偶筆

金鑾字在衡有蕭爽齋樂府最是作家華亭何良俊號

瑣事卷二

二十七

爲知音常云每聽在衡誦小曲一篇令人絕倒

吉山王逢元最是詞曲當家

沈韓峰越工小令鐵面御史能作風流軟媚語賦梅花
者豈獨宋廣平乎

盛壺軒敏耕工小令

石樓高志學秀才工小令

段炳字虎臣秀才和元人馬東籬百歲光陰一套金在
衡見之極口贊賞曰押如此險韻迺得如此妥帖乎足
以壓倒東籬

張四維字治卿號五山秀才有溪上閒情藏于家友人
刊其雙烈記章臺柳兩種戲文行之

黃方胤有陌花軒小詞

詩話

南原王韋秀才時夢中聞人誦兩句詩云起來小步傍
闌干花霧襲衣寒氣重及中弘治乙丑進士閣試庶吉
士以春陰爲題南原憶夢中語遂寫入詩中主試李公
批二句有神助儲靜夫索南原詩看讀至朱樓十二書
沈沈畫棟泥融燕初乳擊節歎賞曰絕似溫李絕似溫
李陸儼山在坐迺曰分明王韋何止溫李蓋指姓名以
戲之也坐中皆笑

湯公讓幼年在府學恃才負氣府尹傳籌不到責以十
板遂棄其中服題詩府門合扉有云從今袖卻經綸手

瑣事卷二

二十八

且向江頭理釣絲之句後以薦官至參將有東谷集
山人徐霖武宗皇帝召命禁直霖作詩紀之云久嗣豳
風學老農聖恩忽漫起疏慵身離陸海三千里目睹天
門十二重封禪無書何獻納清平有調幸遭逢臨流久
洗巢由耳也許來聽長樂鐘及放歸作詩云放歸吾願
遂計日便還鄉免上乞骸疏將求辟穀方無心判恩怨
有道管行藏耿耿思君念他生亦不忘夫霖以布衣召
對除夕應制百韻立成雖雅俗並陳詞多譎諫在帝左
右從容顧問游從竟日夕可謂不世之奇遇武宗屢命
以官辭而不拜終更事變拂衣遂初冥鴻高騫弋人徒
篡此其人豈與嗜甘腐鼠褰裳濡足卒與禍會者同日

語哉既歸而名益震詞翰益奇又幾二十年竟以隱終
楊用修王元美二公品題梅花詩皆取杜子美幸不折
來傷歲暮若爲看去亂鄉愁李商隱玉麟寂寂飛斜月
素手停停待夕陽此論一出却令淡煙疏影之句頓爾
減價吾鄉黃吏部首卿有句云野客佩寒星欲墮佳人
釵煖日初融焦弱侯翰林有句云花開暮雪人歸後香
滿寒庭月上時一似商隱一似子美
蘇侍御舜澤詠西闕梅云此日韶華開禁苑向來吟思
遶江干吾鄉謝與槐極口賞詠之

楊伯海誦鄉先生詠枯木一聯云有枝撐曉月無葉響
秋風句頗清致今不記爲何人之作姑載於此

瑣事卷二

二十九

楊穀上元尹以苦役役其父兄穀往訴之尹以衣巾生
員爲題令其作詩蓋輕之也穀援筆成詩尹見其草中
射虎心空在天上屠龍事已非之句遂免其役

顧東橋公鎮楚三司請遊黃鶴樓先磨一石飲後乞公
留詩東橋在輿中已得雲荒赤壁周瑜壘江繞青山夏
禹祠二句遂援筆書石上云黃鶴仙人身姓誰空傳崔
灝舊題詩雲荒赤壁周瑜壘江繞青山夏禹祠浮世古
今堪灑淚高臺歌舞幾銜卮天寒月白孤鴻遠徙倚闌
干送日遲三司皆服其工

何太吳涇之中萬歷癸未會魁未及殿試告病歸同榜
殷都送之以詩有句云收來駿骨還歸市畫就蛾眉不

入宮可謂事切而語工

姑蘇劉翰林瑛字玉儔在南京讀書時攜酒邀沈重巽
惟申盛時泰仲交同遊清涼寺上環翠閣覩壁閒諸詩
玉儔因以佯狂張藏脰爲韻苦仲交仲交卽走筆書壁
上云三人閣下共徜徉此日風流壓楚狂讀書不數鄭
監稅任俠那誇許少張風生虎向谷旁吼霧盡豹豈山
中藏從來陸雲最文弱休笑形貌多羸脰詩成二君吐
舌相視

吳擴字子充崑山人少喜爲詩歌有聲吳中以布衣游
縉紳閒玄冠白袷吐音如鐘每對客多言平生游武夷
憇匡廬入天台雁宕諸勝事朗誦其所賦詩聽之者如

瑣事卷二

三十

在目中嘉靖年間以避倭寇挈家來金陵愛秦淮一片
水造長吟閣居之曾元日賦一詩懷嚴介溪相國友人
戲之曰開歲第一日懷朝中第一官如此詩情便到臘
月三十日豈能懷及我輩乎坐客皆大笑李子鱗古今
詩刪取子充崔駙馬山池一詩云平陽池館接青霄閬
苑瀛洲路不遙帝女巧將霞製錦仙人常以鵲爲橋樓
前疊石雲生座洞裏探梅雪滿條詞客慣來陪賞洽月
明酣聽鳳凰簫

余喜孫太初贈劉坦翁一聯云閉門句好香殘後搗藥
聲高月上初友人張子明云此句有清趣格迺晚唐耳
且閉門句好兩事也搗藥聲高一事也對之殊覺不工

余深服其論

金大輿自誇吳中友人所贈之詩云家散千金盡詩成萬口傳可謂說盡生平金魚聞其語因戲之曰家散千金是矣足下曾濟人利物乎試添二字何如家散千金盡爲甚詩成萬口傳何曾大輿遂拂衣去

盛仲交游祈澤寺從佛龕中得弊紙上書詩一律云研池滿座落花香墨透纖毫染漢章靜臥納衣雲似水高懸紙帳月如霜柢淨野渡魚龍遠錫振空山虎豹藏幸對爐煙坐終日煮茶清話得徜徉友人褚偵呈雪庭法師座前清覽洪武辛亥暮春書清隱小軒偵字本中不知是金陵何許人也

瑣事卷二

三十一

吳中黃淳甫與姚元白盛仲交在竹素山房擁爐分韻賦春雪仲交得韻點筆成詩淳父索觀仲交不與笑曰若先飲一卮迺可觀淳父遂飲一卮仲交詩云三冬寒始盡初陽氣尙微誰言六出後猶作五花飛入柳驚棉早粘梅訝蕊肥座中同詠客誰是謝玄暉二君極喜誰言六出後猶作五花飛二語之工

王逢元詩爲字畫所掩余三十年前集其詩百首張羽王見而愛之欲草一序刊行竟爾不果今偶得其二詩遂錄之和人無題云晴綻東牆杏子紅露溥南內牡丹叢承恩未必因詞客捐寵何勞怨畫工獨聽遠雞啼曉月幾隨孤燕領春風瑣窗寂寂眠初定夢見笙歌在別

宮又云兩日閒心夢裏寬一春花事雨中殘垂楊不解
青絲結明月先虧白玉盤琴調思長和淚鼓鏡銅衰盡
帶愁看頻過女伴顛狂甚故著羅衣刺合歡

羅敬叔云昨從休甯令丁元父扇頭見焦弱侯一詩有
別來野老頻爭席歸去門生半在樓之句門生何必在
樓乎殊爲未愜余戲之曰君自不讀書迺議焦爲杜撰
乎此句用陶弘景三層樓故事敬叔勃然面赤者久之
敬叔名洽南昌人

周潔字玉如家紅東城南隅胭脂巷中年十四父周碧
山遣侍京兆張羽王羽王棄官觀不數年寄詩一册名
雲巢詩晚晴云久雨愁無極斜陽喜乍開樹披殘靄出

瑣事卷二

三十二

山挾斷雲來的歷穿花逕透迤過渚臺更須林月上清
賞一過陪江邊思家云北望一含愁歸心俯碧流灘雖
注南海湘亦接巴邱天闕當牛斗臺城枕石頭禮家生
長地終歲信悠悠秋山云聞道秋山好重巖溼已銷沙
頭文舫待石上白雲招喜探飛瓊篆羞吹弄玉簫桂岑
多勝概不數赤城標立秋云白帝嚴金駕乘風下紫微
德惟宣湛露令卽屏炎暉乍警青桐落將催赤雁飛何
須賦團扇恩顧似君稀喜雨云入伏炎難度迎秋雨乍
行新涼增雅詠甘澍滿歡聲甫脫衝波厄那堪憫旱情
吾家安石喜恐亦爲蒼生登樓云憑欄一望白雲重松
竹蕭森裊露濃樹外連灘流不斷依稀如聽秣陵鐘戲

諸娣作假花云鏤花雕葉百般新巧手分明遂奪眞自
是深閨無定鑒金錢輸與弄虛人秦淮云秣陵無處望
灘水正前流何不教東下將心到石頭夢還京云自去
長干側終年桂嶺西新秋望鄉處無奈白雲迷憶父云
憶昔當殘臘還家雪正飛三年無一字不忍見鴻歸思
母云慈母頭已白忍見綠萱開空號忘憂草偏令首重
回傷長姊云花落空縈恨鶯啼更助哀芳魂似流水一
去不重回中秋賞月憶諸弟云本共一枝生誰知各南
北今逢三五時會爾何能得觀此數詩固江東一才婦
也

徐姬詠楊花云楊花厚處春陰薄清冷不勝單夾衣吳

瑣事卷二

三十三

中徐昌穀極喜其句作一詩賞之

妓朱斗兒號素娥與陳魯南聯詩有芙蓉明玉沼楊柳
暗銀隄之句人多誦之送所懽于江干題一絕云楊子
江頭送玉郎離思牽挽柳絲長柳絲挽得吾郎住再向
江頭種幾行又託所懽買束腰其人書問尺寸朱答之
云寄買紅綾束如何問短長妾身君抱裏尺寸細思量
鳳陽劉望岑嘗訪素娥素娥不出乃投一絕云曾是瓊
樓第一仙舊陪鶴駕禮諸天碧雲縹緲罡風惡吹落紅
塵四十年素娥欣然見之
舊院妓趙四號燕如答人寄吳箋云感君寄吳箋箋上
雙飛鵲但效鵲雙飛不效吳箋薄

趙氏小妓十四能詩客命作寄情詩以牀字爲壓女吟
云思君君不見明月照牙牀

徐翩翩舊院妓友人誦其紅拂當年事青樓此日心之
句余曰徐姬已辦走路矣後竟從良去良人死削髮爲
尼

舊院妓湘蘭馬守眞詩云自君之出矣不共舉瓊卮酒
是消愁物能消幾個時何減唐之魚玄機李季蘭乎湘
蘭死吳中王穉登挽之云歌舞當年第一流姓名贏得
滿青樓多情未了身先死化作芙蓉也並頭 石榴裙
子是新裁疊在空箱恐作灰帶上琵琶絃不繫長干寺
裏施僧來 不待心挑與目招一生孤負可憐宵祇堪

瑣事卷二

三十四

罰作銀河鵲歲歲年年只駕橋 黃金不惜教嬋娟歌
舞于今樂少年月榭風臺生蔓草鈿箏錦瑟化寒煙
明珠綴在鳳頭鞋白壁雕成燕子釵換得秣陵山十畝
香名不與骨俱埋 舞裙歌扇本前因佛繡長齋是後
身不逐西池王母去定隨南岳魏夫人 水流花謝斷
人腸一葬金釵土盡香到底因緣終未絕他生還許嫁
王昌 平生猶未識蘇臺爲我稱觴始一來何意倏然
乘霧去舊時門戶長青苔 佛燈禪榻與軍持七載空
房只自知試向金籠鸚鵡問不曾私蓄賣珠兒 蘭湯
浴罷淨香薰冉冉芳魂化彩雲遺蛻一坏松下土只須
成塔不須墳 紅牋新擘似輕霞小字蠅頭密又斜開

篋不禁沾臆淚非關老眼欲生花 描蘭寫竹寄卿卿
遺墨都疑淚染成不遇西川高節度平康浪得校書名

畫談

戴文進永樂初年到南京將入水西門轉盼之際一肩行李被脚夫挑去莫知所之文進雖暫識其人然已得其面目之大都遂向酒家借紙筆畫其像聚衆脚夫認之衆曰此某人也同往其家因得其行李

汪肇號海雲休甯人山水人物出入于戴文進吳次翁但多草率之筆曾來南京悞附賊舟值祭江神約夜間劫掠一太守舟欲汪備數汪不逆其意自陳善畫開廂取扇以示無物人各畫一扇贈之及飲酒用鼻吸飲又作戲事以娛勸之賊首不覺沈醉遂悞其事次日因捨舟就陸而行常自負作畫不用朽飲酒不用口云

瑣事卷二

三十五

吳小仙春日同諸王孫游杏花村酒後渴甚從竹林中一老嫗索茶飲之次年復與諸王孫游之老嫗已下世數月小仙目想心存遂援筆寫其像與生時無異老嫗之子得之大哭不休

朱朗字子朗文徵仲得意門人徵仲應酬之作多出於子朗手金陵一人客寓蘇州遣童子送禮于子朗求徵仲贖本童子誤送徵仲宅中致主人之意云云徵仲笑而受之曰我畫真衡山聊當假子朗可乎一時傳以爲笑

文伯仁衡山之猶子畫名不在衡山下好使氣罵座人多不能堪寓棲霞寺白鹿泉庵中數年有東山徐姓者禮請伯仁至家水閣上作畫水閣卽臨太湖賓主相談微有不合伯仁遂掀拳大罵徐隱忍不過迺曰文伯仁在我家敢如此無狀今投爾于太湖誰得知之急呼家僮數人來縛伯仁計無所出長跪求免徐據上坐以大石壓頂歷數其生平而唾罵之伯仁唯唯而已迺免爲魚鱉餌

文伯仁幼年與叔徵仲相訟囚於囹圄病且亟夜夢金甲神呼其名云汝勿深憂汝前身迺蔣子誠門人凡畫觀音大士像非齋戒不敢動筆積此虔誠今生當以畫

瑣事卷二

三十六

名于世也醒來殊覺病頓愈而事亦解矣此伯仁親與余言者

蔣子誠工神鬼江甯縣志載其一事云潘爛頭居驍騎營中相傳因雷火焦其額遂瘡爛竟不愈故號曰爛頭每出羣兒買雷每錢一文以指染頭爛處取膿少許書雷字羣兒手中行數步開手卽雲氣上衝轟然有聲病者索符亦以膿書之或懸于門或火灰而服之卽愈爛頭浼蔣子誠作瘟元帥像久弗與一夕召瘟帥遣至子誠家子誠交睫輒見元帥未幾像成爛頭見而訝之曰神像舊所懸金字牌上書出入天門此像君何易曰無拘霄漢子誠曰豈敢擅易之耶旬日每夕吾見神像所

懸者如此爛頭悟自是天下始改牌面皆曰無拘霄漢云

陸治字叔平號包山吳諸生工于寫生能得徐黃遺意曾見畫一丫蘭寄吾鄉盛仲交自叙云廣南梁中舍遺我丫蘭品質異常隨其感遇賦詩一絕得六首 每莖十六花花各一丫云不與秋蘭並九英仙葩二八自天成祇緣無力禁香重幻作駢文駕玉莖 心帶微紅迎風微動云新裁魯縞紵秋衣肌骨冰瑛酒暈微獨立嫣然風自舉低回翻學舞容璣 花枝應節六葉叢生云玉戟棱棱應節分枝枝柔玉紉香雲凝妝擬待三更月露染生綃六幅裙 瓣若輕綃色帶青黃云方空輕翼

瑣事卷二

三十七

竊青黃製得霓裳稱淡妝香抱幽懷嬌不語含情如欲待迎將 直幹玉立露下尤香云亭亭浴露立西清淡薄秋容幻態輕獨有檀心禁不得一庭香思動蜂嬰葉過三尺花多曉發云三尺丰標高髻妝兩行釵玉一奩香朝朝擬待煙屏展徐攬輕羅上畫堂 鄒鵬家貧資畫以養母一日兩青衣到門自陳主人商於蕪湖特請畫卷軸圍屏先奉白金五兩權辦薪米安家遠之持以問母母喜曰汝速去是汝運通時也遂別母同兩人登舟行三日遠之忽疑曰吾聞蕪湖風便半日可到那得有三日程乎兩人曰實不敢誑吾主人家在鄱陽湖恐以路遠不行故託言蕪湖耳遠之業已在

路無可奈何只得隨行至湖上又陸行數里到其住處主人相見禮意殷勤飲食豐潔令四僮相伴小室中作畫數日後偶閒步窺其廳事見主人金冠紅袍收諸豪客貨物迺知爲緣林長因速完其畫以情告歸主人曰汝貧人留此亦不惡遠之對以家有老母欲歸慰倚門之望遂厚贈之遣人送至上新河遠之歸家對母痛哭云云後無事只閉門凡有求畫者必熟其聲音方與之相見

雲浦盛時泰高才博學有聲場屋學畫雲山于寶幢居士顧源一日寶幢雲浦同聚僧舍友人陳泰華舉蔡中郎戲文中二語嘲之曰雲浦雲浦大丈夫當萬里封侯

瑣事卷二

三十八

怎肯守故園空老蓋故園之音與顧源同也一坐皆笑金靜虛先生在南安太守府中古廟前有空心枯樹一株忽乞食道人坐于樹中遂發生枝葉感動郡人觀者如市道人忽不見追思道人布袍上有補痕宛成呂字知是洞賓顯化靜虛先生異其事畫成一卷名曰長春龕題詩者三十餘人予從市上買得盛仲交借去未還吳小仙飲友人家酒邊作畫戲將蓮房濡墨印紙上數處主人莫測其意運思少頃縱筆揮灑成捕蟹圖一幅最是神妙

林奴兒號秋香成化年間妓風流姿色冠於一時學畫于史廷直王元父二人筆最清潤從良後有舊知欲求

一見因畫柳枝于扇寫二十八字必拒之云昔日章臺
舞細腰任君攀折嫩枝條從今寫入丹青裏不許東風
再動搖

妓朱素娥山水小景得陳魯南授以筆法更入作家一
聞魯南選入翰林庶吉士盡以平日往來詩畫尺牘緘
封寄與魯南上寫云昨日個錦囊佳句明勾引今日個
玉堂人物難親近卽此一舉素娥之風流儒雅可占矣